



Dürant duos uras es gnüda pakettada aint la lana engiadinaisa. In tuot ha Swiss Wool cumprà ot tonnas.

FOTOS MARTIN CAMICHEL

Ot tonnas panuoglias da lana a Scuol

Plüssas panuoglias da lana sül parkegi sur la staziun da Scuol han attrat l'attenziun da la FMR in marcurdi passà. Rebekka Schrade, collavuratura da Swiss Wool, ha declarà l'acziun e che chi capita culla lana engiadinaisa.

MARTIN CAMICHEL/FMR

Chi chi'd es passà in marcurdi passà da Scuol sù Ftan o viceversa ha vis ün purtret insolit sül parkegi sur la staziun. Plüssas panuoglias da lana clera e s-chüra sun gnüdas derasadas sül-plazza ed ün tractor tillas ha pakettadas aint e prodüt ballas albas – adonta chi d'eira fingià la prüma naiv, d'eira ün atmosfera da far cul fain in l'ajer.

L'evenimaint insolit d'eira ün acziun da ramassamaint organisà da Swiss Wool. Scuol es ün da 15 lös da ramassamaint, ingio cha'ls paurs pon dar giò e vender lur lana. In tuot ramassa Swiss Wool intuorn 350 tonnas lana l'on, quai chi'd es circa la mità da tuot la lana svizra. In marcurdi passà han vendü ils paurs engiadinais passa ot tonnas lana a Swiss Wool.

Materia primara per divers prodots

In Svizra vain la bescha tgnüda per chürar la cuntrada. Sch'ella es da stà sün alp, lura güda la bescha ad evitar ingondimaint ed a mantgnair la biodiversità. Perquai ha ella dabsögn d'ün pagl gross e robust. Uschè cha la qualità da la lana nun es i'l focus dals paurs svizzers. «La sfida da la lana svizra es ch'ella es uschè gruoglia e chi nu's po perquai tilla portar sül pel. Perquai vain la lana dovrada per oter prodots», ha dit Rebekka Schrade, organisatura da las acziuns da ramassamaint da Swiss Wool.

La lana da beschs svizzers vain dovrada sco materia primara per izolaziuns – per giaccas o eir per chasas – per panels accustics sco eir per duvets e matratschs. Our da la lana da rest vain lura amo prodüt aldüm uschè chi nu dà üngün s-chart.

Dar valur a la lana svizra

«Fin avant var 12 ons cumprava la Confederaziun la lana dals paurs e quai sur il predsched dal marchà – quasi sco subvenziun», ha declarà Rebekka Schrade. Ella ha agiunt cha'l predsched da lana saja crodà davò cha la Confederaziun nun ha plü sustgnü la compra da la lana ed uschè es la lana pelpü gnüda simplamaing arsa. «Per pudair darcheu dar valur a la lana svizra e per tilla pudair elavurar es lura gnü fundà Swiss Wool», ha dit Rebekka Schrade. Duos voutas l'on – adüna da prümvaira e d'utuon – han lö quistas acziuns da ramassamaint e compra in tuot la Svizra. Rebekka Schrade organischa la coordinaziun da las occurrenz, ils paurs indigens pisseran per las maschinis e lavuraints. Il credo da Swiss Wool es d'elavurar tuot la lana, listess da che razza da besch e da che qualità.



Swiss Wool organischa ils ramassamaints, ils paurs indigens mainan las maschinis e'ls lavuraints.

«Per pudair darcheu dar valur a la lana svizra e per tilla pudair elavurar es lura gnü fundà Swiss Wool.»

Rebekka Schrade,
collavuratura Swiss Wool

Diversas qualitats

Davo cha'ls paurs vaivan manà lur lana a Scuol, è'la gnüda sortida in categorias da qualità: «La lana lunga, fina ed alba es la qualità A – la lana da qualità B es lura ün pa plü cuorta. Lura dajamo la lana masdada, la lana brüna e la lana da rest, quella chi'd es magari suos-cha», ha declarà Rebekka Schrade. Davo la classificaziun sun gnüda fattas panuoglias da lana tenor la qualità ed ün tractor ha pakettà aint la lana in folia da plastic alba. Il resultat d'eira üna balla – na da strom – dimpersè da lana.

Ils paurs han survgni 1 franc al kil per la lana da qualità A e lura fin a 20 raps per la plü noscha qualità. «Quai sun amo predschs bass, chi nu cuernan gnanca ils cuosts da tuonder – ma grazcha a Swiss Wool es il predsched fingià creschü ün pa», uschè la collavuratura da Swiss Wool. In congual cul predsched da lana internaziunal saja quai però fich bler. Uschè cuosta p.ex. ün kilo lana da merino – lavada e da la Nouva Zelanda – pü pac co ün franc. Davo l'acziun da racolta sun las ot tonnas lana engiadinaisa gnüdas charginas sün ün camiun, chi s'ha miss in viadi vers la Belgia, ingio cha la lana vain lavada. Davo tuorna ella lura darcheu in Svizra pro Swiss Wool. Divers partenaris e producents la elavureschan in seguit.

TESSVM



Il co-directorium da Bernhard Aeschbacher e Claudio Daguati pro la TESSVM vain mantgnü.

FOTO MAD

Il co-directorium vain mantgnü

Daspö ils 1. da settember 2022 mainan Bernhard Aeschbacher e Claudio Daguati la gestiun sco co-directorium pro la Turissem Engiadina Scuol Samignun Val Müstair SA (TESSVM) ad interim. Tuots duos lavuran daplù co desch ons pro la TESSVM e causa las bunas experienzas dals trais mais passats ha il cusagl d'administraziun decis da mantgnair il co-directorium da Bernhard Aeschbacher und Claudio Daguati. Sco cha la TESSVM scriva in üna comunicaziun es quai a partir dals 1. da december 2022 il cas e la gestiun schlargiada vain completada cun Tinetta Strimer.

Bernhard Aeschbacher es sco fin uossa responsabel per l'infurmaziun dals giasts sco eir per events. Claudio Daguati maina inavant las spartas marketing, content e management da prodots. Tinetta Strimer sarà a partir dal principi da december 2022 manadra dals servezzans centrals da la TESSVM schlargiada. (cdm/fmr)

LAVIN

«My Pussy Real Soft»

In sonda, ils 3 da december 2022 a las 20:30 in La Vouta a Lavin, rapreschainta la performra Sonja Silber aka Sonja Hartmann seis prüm program «My Pussy Real Soft». Üna narra cun testa fina rappescha ün omaggio sül chasada e's confruntescha cul sexissem da la società: «Sun las duonnas sves la cuolpa sch'ellas vegnan molestadas sexualmaing?», dumanda l'actura da movimaint e demuossa las consequenzas da stereotips sexistis in seis toc. Per quel es l'artista grischuna eir gnüda nominada pel Jungsegler Preis 2022. Sül palc vain Sonja Silber accumpagnada live da sounds da Pascal-Oliver Lüthi. La squadra da La Vouta dumonda da s'annunzchar pro els per reservar üna piazza. (cdm/fmr)



In sonda chi vain rapreschainta Sonja Silber seis toc «My Pussy Real Soft» in La Vouta a Lavin.

FOTO MAD

ENGIADIN'OTA

Trer chandailas per pitschen e grand

La raspeda evangelica da l'Engiadin'Ota «refurmo» invida eir quist an darcho ad ün trer chandailas public a Segl ed a San Murezzan. In dumegia, ils 3 december 2022 traunter las 10.00 e las 15.30, paun iffaunts scu eir creschieus trer chandailas il-la baselgia aviarta a Segl. Pel bainesser da las partecipantas e dals partecipants vain eir pissero. Chi chi ho vöglià po exponer sia chandaila e piglier part a la vernissascha e la premiaziun da las chandailas, chi ho lö i'l ram d'ün cult divin per tuots. Quel es in dumengia, ils 4 december 2022 a las 9.30, il-la baselgia aviarta a Segl.

A San Murezzan vain trer chandailas i'l ram dal marcho da Nadel in venderdi, ils 9 december 2022 traunter las 16.00 e las 19.00 scu eir in sanda, ils 10 december 2022 traunter las 14.00 e las 18.00. Üna annunzcha nun es necessaria. (cdm/fmr)

FMR FUNDAZIUN
| MEDIAS
RUMANTSCHAS